

АКАФИСТ СВЯТОЙ И РАВНОАПОСТОЛЬНОЙ ВЕЛИКОЙ КНЯГИНЕ РУССКОЙ ОЛЬГЕ

Кондак 1

Первоизбранней от всего русского рода, славней и равноапостольней угоднице Божией Ольге составим похвалу, яко заре во тьме идолопоклонения светом веры возсиявшей и путь ко Христу всем людем русским показавшей. Ты же, яко имущая дерзновение к прославльшему тя Господу, ограждай нас от всяких бед молитвами твоими, да зовем ти: Радуйся, святая равноапостольная княгине Ольго богомудрая.

Икос 1

Ангелов и человеков Творец, времена и лета во Своей власти положивый и судьбы царств и народов по Своей воли управляй, егда восхоте род русский Святым Крещением просветити, тогда, видя благое изволение сердца твоего, призва тя первее в познание Себе, да будеши всем русским людем образ и наставница в христианстей вере. Сего ради восхваляем тя сице: Радуйся, русского небесе утреннее звездо, от Первозванного апостола на горах Киевских предвозвещенная. Радуйся, пречудная леторасле, из нея же велие правоверия древо на земли нашей возрасте. Радуйся, первоучительнице и просветительнице наша; радуйся, яко тобою познахом поклоняться в Троице Творцу. Радуйся, яко тебе ради Пресвятое Имя Господне от всех русских людей прославляется; радуйся, яко и твое преславное имя вкупе с равноапостольным Владимиром во всех пределах мира восхваляется. Радуйся, страны нашея Русския духовное сокровище; радуйся, всея Христовы Церкви преславное украшение. Радуйся, градов Киева и Пскова изрядная доброто; радуйся, людем нашим на враги благая помощнице. Радуйся, святая равноапостольная княгине Ольго богомудрая.

Кондак 2

Видяще тя, святая Ольго, яко крин в тернии прозябший: ты бо аще и в роде язычестем рождена еси, обаче закон Божий в сердце твоем написан всегда имела еси, и целомудрие твое яко зеницу ока блюла еси; благодарно поем Дивному во святых Своих Богу: Аллилуиа.

Икос 2

Разумом твоим вся добре ведящи, познала еси, богомудрая Ольго, яко идоли, рукама человеческими сотвореннии, не суть бози, темже, отвергши тыя, потщалася еси познати Бога истиннаго. Сего ради, похваляюще сицевое твое благоразумие, вопием ти сице: Радуйся, добрая жено, первее всех заблуждение русских людей познавшая и тщету идолопоклонения разумевшая. Радуйся, истин-

наго Богопознания и правыя веры усердно искавшая. Радуйся, прежде разумения закона Божия, по закону совести праведно жившая; радуйся, прежде приятия христианския веры дела христианом подобающая творившая. Радуйся, державу твою от нашествия супостат мужественно защитившая; радуйся, в подчиненных ти людех суды праведны творившая. Радуйся, царственною славою на земли и на небеси почтенная. Радуйся, яко равноапостольная от Бога прославленная. Радуйся, святая равноапостольная княгине Ольго богомудрая.

Кондак 3

Силою благодати Божией движима, потщалася еси, богомудрая Ольго, достигнути Царьграда, идеже зрящи красоту церковнаго благолепия, и слушающа учения словес Божественных, распалася еси всем сердцем твоим в любовь Христову, благодарственно вопиющи Ему: Аллилуиа.

Икос 3

Имея сердце яко добрую землю, удобь восприяла еси, Ольго, семя святая веры, познавши Христа Бога истиннаго. Темже и Крещение Святое прияла еси от руку патриарха Царьграда иже и предрече ти, яко отныне блажите тя имут русстии сынове. Исполнити убо хотя проречение сие, взываем ти сице: Радуйся, безконечныя пагубы верою избежавшая. Радуйся, жизнь вечную во Христе стяжавшая. Радуйся, благодатию Святаго Духа духовно родившаяся. Радуйся, разумная горлице, от когтей душепагубного врана излетевшая; радуйся, под криле Орла Небеснаго прилетевшая. Радуйся, множество душ Крещением с собою ко Христу приведшая. Радуйся, с верою несумненною приходящих светом от честных твоих мощей осиявающая; радуйся, душам и телесем тех, яже на пользу, подавающая. Радуйся, святая равноапостольная княгине Ольго богомудрая.

Кондак 4

Како можем не удивитися благоразумию твоему, Ольго преблаженная, ибо ты предложение царя еллинов о браке с ним разумно отвергла еси, рекши тому: не брака ради приидох семо, и не соцарствования ради с тобою, но да уневещуся Крещением Безсмертному Жениху Христу Богу: Его же паче всего возлюби душа моя и Ему же отныне во веки не престану воспевати: Аллилуиа.

Икос 4

Улышавши от крестившаго тя патриарха напутственное слово о чистоте, посте, молитве и о всех добродетелех, христианом подобающих, слагала еси сия в сердца твоем, дела вся та исполняти обещавався. Темже убо по долгу воспеваем ти сице: Радуйся, ниву сердца твоего очистившая от терния душевредных страстей; радуйся, оросившая ю слезами покаяния. Радуйся, яко семя слова Божия в сердца твоем, яко на земли добрей, укоренися. Радуйся, вдовственную твою чистоту непорочно сохранившая; радуйся, воздержанием и молитвою Богу угодившая. Радуйся, милостынею Творца умилившая; радуйся, нищия и

убогия потребами снабдившая. Радуйся, просвещение земли Русския светом Христова учения провидевшая. Радуйся, святая равноапостольная княгине Ольго богомудрая.

Кондак 5

Боготканною одеждою Святаго Крещения облекшись нетленною пищею Пречистаго Тела и Крове Христовы духовно укрепльшись, Ольго преблаженная, не убоялася еси потещи к неверным соотечественником твоим, предком нашим, проповедати им Единого Истиннаго Бога, Ему же ныне вся Русь, яко едиными усты, воспеваает: Аллилуиа.

Икос 5

Видевши, святая Ольго, вся люди земли Русския во идолослужения погруженные, усердно потщалася еси просветити тыя светом Христовы веры и сотворити я сыны и наследники Царствия Небеснаго. Поминающе убо сицевое твое попечение о них, благодарственно зовем ти: Радуйся, премудрая властительнице народа русского. Радуйся, первой христианстей царице Елене в ревности Божественней подражавшая; радуйся, и имя тоя во Святем Крещении приявшая. Радуйся честный крест Христов и святыя иконы из Царьграда во град Киев принесшая; радуйся, иереи и клирики с собою в Русь приведшая. Радуйся мудрыми твоими глаголы поучавшая люди оставити тму языческаго нечестия и восприяти свет христианского благочестия. Радуйся, многия русския люди светом веры Христовы просветившая. Радуйся, первая от земли Русския лику святых причтенная. Радуйся, святая равноапостольная княгине Ольго богомудрая.

Кондак 6

Проповедником духоносным апостолом подражавши, Ольго богомудрая, обходила еси грады и веси державы твоея, приводящи, елико мощно бе, люди к вере Христовей и научающи их воспевати Единому в Троице славимому Богу: Аллилуиа.

Икос 6

Утверждая в державе твоей начаток веры христианския, создала еси храмы Божии во граде Киеве и в стране рождения твоего, при реце Велицей у града Пскова. И тако начаша русские людие прославляти повсюду Христа Бога нашего, тебе же, просветительнице своей, похвальная воспевати: Радуйся, яко от чистаго источника Святыя Соборныя и Апостольския Церкви чистое учение прияла еси. Радуйся, идольских требищ и кумиров низложительнице. Радуйся, яко же и Первозванный апостол, с проповедию Евангелия землю Русскую обходявшая. Радуйся, на местех проповеди твоея честныя кресты водрузившая и от тех многая знамения и чудеса, уверения ради неверных, силою Божию содевахуся. Радуйся, яко тобою Всеблагий Господь сыновом русским познание Свое явил есть; радуйся, яко чрез них и прочия многия народы светом веры просве-

тил есть. Радуйся, яко от корене твоего честного Господь святого равноапостольного князя Владимира показал нам есть; радуйся, яко образом жития твоего святой князь Владимир подвигся прияти христианскую веру. Радуйся, святая равноапостольная княгине Ольго богомудрая.

Кондак 7

Хотя избавити сына твоего Святослава от пагубы вечныя, прилежно увещевала еси его оставити почитание идолов и веровати в Бога истиннаго. Но той не внят матернему наказанию твоему и не восхоте нечестие свое пременити на благочестие. Темже, яко неверный, очуждися жизни вечныя и не сподобися с тобою в Горнем Царствии воспевати: Аллилуиа.

Икос 7

Новое знамение благоволения Своего яви тебе Господь, егда, во образ Пресвятыя Троицы, три пресветлыя луча с небесе облиста на месте дубравне, ихже не точию едина ты зрела еси, но и вси сущии тамо людие видеша, и вкупе с тобою прославиша Триединаго Бога. Мы же, ведуще сбытие пророчения твоего о создании на месте оном храма Живоначальныя Троицы и града, ублажаем тя сице: Радуйся, великая Божия угоднице, дара пророчества сподобльшаяся. Радуйся, трисияннаго небеснаго света зрительнице; радуйся, всеблагия воли Божией о просвещении народа русскаго по апостоле Андрее первая исполнительнице. Радуйся, града Пскова начальная основательнице; радуйся, всея Русския державы заступнице и покровительнице. Радуйся, яко изволением Божиим держава Русская ныне от моря до моря распространися; радуйся, яко в храмах твоих Безкровную Жертву о людех Богу приносят и хвалу Святей Троице воспевают. Радуйся, яко обитателие града Киева и Пскова сугубо тя превозносят и ублажают; радуйся, святая равноапостольная княгине Ольго богомудрая.

Кондак 8

Странствия земнаго течение скончавая, тепле Господа молила еси, Ольго блаженная, да не оставит Он земли Русския по преставлении твоем во тме неведения пребывати, но да возложит на сердце людем русским, обратитися к Богу, да воспоят Ему: Аллилуиа.

Икос 8

Вся объята бывши благодатию Божественною, достохвальная Ольго, мысленными очесы зрела еси просвещение всего народа твоего и пророчески предрекла еси, яко мнози велиции угодницы Божии, яко звезды светлыя, в земли Русской возсияют, еже и сбытся изволением и благодатию Всемогущаго Бога. Сего ради по долгу воспеваем ти сице: Радуйся, духовная наша мати, испросившая у Бога просвещение праотцем нашим; радуйся, яко Всеблагий Господь, зря доброту души твоя, тебе ради вся люди русския возлюби. Радуйся, яко ты обрете Христос достоин сосуд, чрез негоже нача изливати благодать Свою зем-

ли Русской. Радуйся, яко прозорливо предзрела еси величие и славу державы твоея. Радуйся, яко по проречению твоему, мнози святии от рода нашего возсияша; радуйся, дома Живоначальная Троицы устроительнице. Радуйся, молитвами твоими в скорбех и напастех нас заступающая; радуйся, во обстояниях злых Отечество наше сохраняющая и от врагов избавляющая. Радуйся, святая равноапостольная княгине Ольго богомудрая.

Кондак 9

Всяких добродетелей исполнена бывши, Ольго блаженная, с молитвою во устех предала еси дух твой в руце Божии, Иже всели тя в Небесныя обители и первую от русских людей сопричте лику равноапостольных угодников Своих. Темже испроси убо и нам у Господа мирную христианскую кончину, да предадим души наша в руце Христа Бога нашего, поюще Тому хвалебную песнь: Аллилуиа.

Икос 9

Витии многовещаннии не могут достойно восхвалити тя, Ольго богомудрая: како ты, ни ким же от человек учима и увещеваема, познала еси тщету идолслужения, правыя же веры взыскала еси и, якоже равноапостольная Елена, обрела еси безценный бисер, Христа, Егоже лицезрения небеси наслаждаяся ныне, не забуди нас, прелестьми мира сего омрачаемых и о благах вечных забывающих, да, тобою на путь правый наставляеми, взываем ти радостно: Радуйся, добрыми твоими делы и правым ума и сердца изволением приуготовившая себе жилище Божественной благодати; радуйся, яко Сам Дух Святыи учитель тебе бысть к познанию Христа Сына Божия. Радуйся, ни киих же знамений и чудес видевшая и во Христа веровавшая. Радуйся, совершенную покорность воле Божией показавшая и звавшему тя гласу благодати Святаго Духа послушна явившаяся; радуйся, с едионадесятаго часа в вертограде Господнем потрудившаяся и мзду с первыми получившая. Радуйся, яко умудри тя Господь, честь царскую, богатство и славу, сочетати со смирением христианским; радуйся, яко сим образом яве показавшая нам, яко блага земныя не суть препятие души боголюбивей к достижению благ небесных. Радуйся, крепостию веры и целомудренною чистотою жития твоего пророчества дар от Бога восприявшая. Радуйся, святая равноапостольная княгине Ольго богомудрая.

Кондак 10

Путь спасения сыновом русским устроая и предсмертное прошение твое исполняя, Всеблагий Господь возрасти во внуце твоем Владимире всеянное тобою семя веры, и чрез него всю землю Русскую просвети Святым Крещением. Темже убо прославляем тя, Ольго блаженная, яко виновницу просвещения нашего светом святых веры. и умильно поем Христу Спасителю нашему: Аллилуиа.

Икос 10

Прияв Святое Крещение, внук твой Владимир, потщася изъяти из земли нетленные, исполненные чуднаго благоухания, мощи твоя, и со святителем Леонтием и всем множеством народа постави я в церкви Пречистыя Богоматери, и оттоле начаша источатися от них цельбы всяким недугом, притекающим с верою. Сего ради восхваляем тя сице: Радуйся, яко благодать Святаго Духа, в тя всельшася, сотвори в мощех твоих цельбоподательный источник всяким недугом. Радуйся, с маловерием к ним приходящих видети я не попускавшая. Радуйся, явлением мощей твоих младенствовавшую Церковь Русскую возвеселившая; радуйся, прославлением их внука твоего Владимира зело обрадовавшая. Радуйся, яко и до ныне благодетельныи люди земли Русския славною памятью твоею улаждаются; радуйся, яко твоим к Богу ходатайством вернии люди русские многих благ от Господа сподобляются. Радуйся, молитвами твоими о просвещении земли Русския Бога умолившая; радуйся, вскоре многим великим святым явитися на земли Русской прорекшая. Радуйся, святая равноапостольная княгине Ольго богомудрая.

Кондак 11

Пение умиленное приносим ти, угоднице Божия, и смиренно тя молим: моли о нас Единого Человеколюбца Бога, да не отвратит лица Своего от нас, недостойных, присно согрешающих и преогорчевающих благодать Его, но да накажет нас zde, яко Отец чадолюбивый, онаможе, в будущем веце, да спасет и помилует, яко Судия и Мздовоздаятель праведный, да тако, избавльшеся вечнаго мучения, сподобимся с тобою в райских обителех воспевати Ему: Аллилуиа.

Икос 11

Трисиянным светом осияваема, со всеми святыми предстоиши ныне на Небеси Престолу Царя царствующих, Ольго всеблаженная, и оттуду, яко светозарное светило, просвещаеши всю страну Русскую, разгоня мрак заблуждений и показуя путь к истинному просвещению и Небесному блаженству. Сего ради прославляюще тя глаголем: Радуйся, путеводительнице, правую стезю к вечному спасению нам показующая. Радуйся, мощная споспешнице и укрепительнице проповедников православныя веры; радуйся, присная покровительнице благих наставников благотрудящихся на пользу общую. Радуйся, крамол и раздоров потребительнице; радуйся, всех обидимых и неправедно гонимых заступнице. Радуйся, скорбящих скорая утешительнице; радуйся, болящих милостивая исцелительнице. Радуйся, людем нашим помощь молитвами твоими от Бога подающая; радуйся, всея страны Русския предстательнице и заступнице. Радуйся, святая равноапостольная княгине Ольго богомудрая.

Кондак 12

Благодать Пресвятаго Духа испроси нам, наставнице наша, от Всещедраго Бога и Спаса нашего, вразумляющую и укрепляющую нас в деле спасения, да не

безплодно будет в нас всеянное тобою семя Святыя Веры, но да прозябнет и плод сотворит, имже бы возможи нам питати души наша в будущей вечной жизни, идеже вси святии воспевают Богу: Аллилуиа.

Икос 12

Поюще твоя многая и преславная благодеяния, явленная стране Русской в просвещении того светом веры Христовой, благодарственно приносим ти, с любовью зовуще сицевая: Радуйся, несокрушимое ограждение земли Русския; покров и защищение. Радуйся, девам русским образ целомудренного жития; радуйся, матерем наставнице законного сожития и добраго чада воспитания. Радуйся, вдовицам правило спасения; радуйся, соучастнице на Небеси жребия проповедников веры Христовы. Радуйся, усердная о спасении нашем ходатаице. Радуйся, в час смерти нашея о нас к Богу молитвенница; радуйся, по исходе нашем от смертного сего телесе помощь и утешение подающая. Радуйся, святая равноапостольная княгине Ольго богомудрая.

Кондак 13

О святая равноапостольная, великая княгине Ольго, прими милостивно от нас хвалебное благодарение сие о всех, яже тобою воздаде Господь нам, отцем и праотцем нашим и всей державе Русской, и моли всеблагаго Бога умножити милость Свою на ны и на роды родов наших, утвердити ны в правоверии и благочестии, хранити же от всех напастей, бед и зол, да сподобимся с тобою, яко чада с материю, во веки воспевати Богу: Аллилуиа.

(Этот кондак читается трижды, затем икос 1 и кондак 1)